

大方廣佛華嚴經隨疏演義鈔卷第二沙二

唐清涼山大華嚴寺沙門 澄觀述

疏廣大即入於無間塵毛包納而無外者第二廣狹自在無礙門上句大能入小下句小能容大雖有即入意取廣狹無間謂小小之則無內以無內故無有中間無外謂大大之則無外無外即是廣大之身剎即入無內之塵毛故名廣狹無礙若即若入皆得廣狹無礙經云金剛圍山數無量悉能安置一毛端欲知至大有小相菩薩以是初發心至大有

小相即廣狹無礙也又云能以小世界作大世界大世界作小世界等疏炳然齊現猶彼芥餅者即第三微細相容安立門一能含多即曰相容一多不雜故云安立炳者明也微細有三一所含微細如瑠璃餅盛多芥子炳然齊現不相妨礙非前非後此即如來不思議境界經說然有兩本一本云白芥子一本即但云芥子今依此本謂一法稱性含容皆盡故一切法隨所合理現在一中亦是緣起實德無礙自在致使相容非天人所作乃得

安立如八相中一一相內即具八相名為微細二約能含微細三約難知微細疏具足同時方之海滴者第四同時具足相應門如大海一滴即具百川之味十種之德故隨一法攝無盡法及下九門以此一門為其總故同

時明無先後具足所攝無遺言十德者十地經云一次第漸深二不宿死屍三餘水入中皆失本名四普同一味五具無量珍寶六深難得底七廣大無量八大身所居九潮不過限十普受大雨涅槃經云如人入大海浴則

為已用諸河之水稱此而修一行之內德不可盡疏一多無礙等虛室之千燈者第五一多相容不同門由一與多互為緣起力用交徹故得互相涉入是曰相容不壞其相故云不同如一室內千燈並照燈隨盞異一一不同燈隨光遍光涉三入常別常入經云一中解無量無量中解一了彼互生起當成無所畏此之燈喻亦可喻於相即直就光看不見別相唯一光故疏隱顯俱成似秋空之片月者第六秘密隱顯俱成門如八九月半月半隱

半顯正顯即隱正隱即顯不同晦月隱時無顯不同望月顯時無隱以一攝多則一顯多隱以多攝一則多顯一隱一毛攝法界則餘毛法界皆隱餘一一毛互相攝入隱顯亦然然其半月非但明與暗俱而亦明下有暗暗下有明如東方入正定爲一半明西方從定起爲一半暗而東方入處即於東起如明下有暗西方起處即於西入如暗下有明故稱秘密隱顯俱成門疏重重交映若帝網之垂珠者第七因陀羅網境界門如天帝殿珠網覆

上一明珠內萬像俱現諸珠盡然又互相現影影復現影重重無盡故千光萬色雖重重交映而歷歷區分亦如兩鏡互照重重涉入傳曜相寫迤出無窮疏念念圓融類夕夢之經世者第八十世隔法異成門即離世間品

菩薩有十種說三世謂過去說過去過去沙二說現在過去說未來現在說過去現在說平等現在說未來未來說過去未來說現在未來說無盡三世說一念前九爲別一念爲總故名十世以三世相因互相攝故一念具十

以顯無盡故一念即無量劫無量劫即一念
善賢行品云無量無數劫解之即一念知念
亦無念如是見世間如一夕之夢經於數世
攝論云處夢謂經年覺乃須臾頃故時雖無
量攝在一剎那離世間品云如人睡夢中造
作種種事雖經億千歲一夜未終盡故莊生
夢蝴蝶假寐百年事類廣矣疏法門重疊若
雲起長空者第九託事顯法生解門言重疊
者意顯一多不相礙故隨一一事有多法門
以隨一事即是無盡法界法界無盡故事亦

無盡迴向品云此華即從無生法忍之所生
起等意明一切因生一果一果即具一切因
故非是託此別有所表也疏萬行紛披比華
開錦上者第十諸藏純雜具德門至相十玄
中有此名也然有二意故賢首改為廣狹自
在無礙門一者若以契理為純萬行為雜即
是事理無礙非事事無礙設如菩薩大悲為
純盡未來際唯見行悲餘行如虛空若約雜
門即萬行俱修者此二門異亦不成事事無
礙二者如一施門一切萬法皆悉名施所以

名純而此施門即具諸度之行故名爲雜如是純之與雜不相障礙故名具德則事事無礙義成而復一中具諸度諸度存即名相入門若諸度泯復似相即門故不存之改爲廣狹今以至相但約行爲小異此段略無王伴故復出之以成十義耳言比華鬘錦上者意取五綵之線華色雖異一一之線皆悉通過通喻於純異喻於雜故常通常異名爲無礙不同繡畫但異不通上之十玄略陳大裕廣如向下義分齊中疏若夫高不可仰則積行菩薩

永樂北藏

華嚴經隨疏演義鈔

第一七一册

曝鰓鱗於龍門下第七成益頓超文有十義初有二義總顯高深明權小莫測後八正明成益頓圓又前二高深反顯成益明權小不測由昔無因反勸衆生令信仰故後八順顯成益謂能頓能圓令必受故今初即第一明高遠若泰華倚天岷峨拂漢難仰其頂故論語云仰之彌高鑽之彌堅積行菩薩者出現品云設有菩薩於無量百千億那由他劫修行六波羅蜜修習種種菩提分法若未聞此如來不思議大威德法門或時聞已不信不

解不順不入不得名為真實菩薩以不能生
如來家故若得聞此如來無量不思議無障
無礙智慧法門聞已信解隨順悟入當知此
人生如來家等如魚登龍門若得登者即化
為龍如入華嚴之機也若登不過者曝鰓鱗
於龍門之下如假名菩薩即權教次第修者
疏深不可窺則上德聲聞杜視聽於嘉會者
第二彰深妙也即法界品初舍利弗等五百
聲聞彼歎德云悉覺真諦皆證實際深入法
性永出有海依佛功德離結使縛住無礙處

其心寂靜猶如虛空於諸佛所永斷疑惑於
佛智海深信趣入釋曰即上德也在逝多林
如來嘉會而不見聞名杜視聽杜猶塞也在
目曰視在耳曰聽雖在會下如聾如盲故云
杜視聽也故經云爾時上首諸大聲聞舍利
弗大目犍連摩訶迦葉離波多須菩提阿菟
樓駄難陀劫賓那迦旃延富樓那等諸大聲
聞在逝多林皆悉不見如來神力如來嚴好
如來境界如來遊戲如來神變如來尊勝如
來妙行如來威德如來住持如來淨刹亦復

不見不可思議菩薩境界菩薩大會菩薩普
 入菩薩普至菩薩普詣菩薩神變菩薩遊戲
 菩薩眷屬菩薩方所菩薩莊嚴師子之座菩
 薩宮殿菩薩住處菩薩所入三昧自在菩薩
 觀察菩薩頻申菩薩勇猛菩薩供養菩薩受
 記菩薩成熟菩薩勇健菩薩法身清淨菩薩
 智身圓滿菩薩願身示現菩薩色身成就菩
 薩諸相具足清淨菩薩常光衆色莊嚴菩薩
 放大光明寶網菩薩起變化雲菩薩身徧十
 方菩薩諸行圓滿如是等事悉皆不見何以

故善根不同故本不修習見佛自在諸善根
 故本不讚說十方世界一切佛剎清淨功德
 故本不稱歎諸佛世尊種種神變故本不於
 生死流轉之中發阿耨多羅三藐三菩提心
 故本不令他住菩提心故本不能令如來種
 性不斷絕故等上少二來先列人即是上德聲聞
 次明不見等即杜視聽也何以故下釋不見
 因劣者不見猶未爲深上德不知方爲玄妙
 疏見聞爲種八難超十地之階下文有八段
 正顯成益圓徧之相此第一段明見聞益亦

名爲種益即隨好品地獄天子三重頰圓及
初地云雖住海水劫火中堪受此法必得聞
其有生疑不信者永不得聞如是義不信不
聞翻顯信聞則成利益海水是龍畜生趣攝
劫火是天火災及初禪生在二禪光音等天
長壽天難於此得聞兼上地獄天子已有三
難佛會神鬼亦聞三塗足矣火災之時兼佛
前佛後人天道異已兼辨聰亦不揀北州龔
者目視盲者耳聞故八難具矣皆容聞經爲
種之義超十地之階正在地獄天子舉重攝

輕阿鼻地獄尚得頰圓忝在人倫豈不留聽
故隨好光明功德品佛告寶手菩薩言佛子
菩薩足下有千輻輪相名光明普照王此有
隨好名圓滿王常放四十種光明中有一光
名清淨功德能照億那由他佛刹微塵數世
界隨諸衆生種種業行欲樂皆令成熟阿鼻
地獄極苦衆生遇斯光者皆悉命終生兜率
天既生天已天鼓發聲廣爲說法乃至云爾
時諸天子聞說普賢廣大迴向得十地故獲
諸力莊嚴三昧故以衆生數等清淨三業悔

除一切諸重障故即見百千億那由他佛刹
微塵數七寶蓮華一一華上皆有菩薩結跏
趺坐放大光明等乃至以華散菩薩上又云
其諸香雲普雨無量佛刹微塵數世界若有
衆生身蒙香者其身安樂乃至云滅八萬四
千諸煩惱結云如是知已成就香幢雲自在
光明清淨善根釋曰此即一重得十地次云
若有衆生見其蓋者種清淨金輞轉輪王一
恒河沙善根釋曰此即第二重得十地也後
文云是菩薩摩訶薩住清淨金輞轉輪王位

放摩尼髻清淨光明若有衆生遇斯光者皆
得菩薩第十地位成就無量智慧光明得十
種清淨眼乃至十種清淨意具足無量甚深
三昧釋曰此即第三重得十地也疏解行在
躬一生圓曠劫之果者第二解行益七十八
經慈氏讚善財云餘諸菩薩於無量百千萬
億那由他劫乃能滿足菩薩願行乃能親近
諸佛菩薩此長者子於一生內則能淨佛刹
則能化衆生則能以智慧深入法界則能
成就諸波羅蜜則能增廣一切諸行則能

圓滿一切大願則能超出一切魔業則能承
事一切善友則能清淨諸菩薩道則能具足
普賢諸行及大威光太子亦是一生圓多劫
之果上二皆明證速又此經宗明三生圓滿
一見聞生二解行生即上二句三證入生即
下二句疏師子奮迅衆海頓證於林中者第
三頓證益也第六十經初云爾時世尊知諸
菩薩心之所念大悲爲身大悲爲門大悲爲
首以大悲法而爲方便充徧虛空入師子頻
申三昧舊經云奮迅奮迅之義就師子說其

義便故至第六十一經初普賢開發後如來
眉間放光照故時逝多林菩薩大衆悉見一
切盡法界虛空界一切佛刹一一微塵中各
有一切佛刹微塵數諸佛國土種種名種種
色種種清淨種種住處種種形相如是一切
諸國土中皆有大菩薩坐於道場師子座上
成等正覺菩薩大衆前後圍繞諸世間主而
爲供養等乃至云是故皆得入於如來不可
思議甚深三昧盡法界虛空界大神通力或
入法身或入色身或入往昔所成就行或入

圓滿諸波羅蜜或入莊嚴清淨行輪或入菩薩諸地或入成正覺力或入佛所住三昧無差別大神變或入如來力無畏智或入佛無礙辯才海即頓證林中廣說以十能入入此所入疏象王迴旋六千道成於言下即第四超抄二權益即六十一經末會之初六千比丘會身子令六千比丘觀文殊十德六千請往欲見文殊身子令見爾時文殊師利童子無量自在菩薩圍繞并其大衆如象王迴觀諸比丘故云象王迴旋言六千道成於言下者比

丘興願文殊令發十種無疲厭心時諸比丘聞此法已則得三昧名無礙眼見一切佛境界得此三昧故悉見十方無量無邊一切世界諸佛如來及其所有道場衆會皆悉見彼十方世界一切諸趣所有衆生亦悉見彼十方世界種種差別亦悉見彼一切世界所有微塵亦悉見彼諸世界中一切衆生所住宮殿以種種寶而爲莊嚴及亦聞彼諸佛如來種種言音演說諸法文詞訓釋悉皆解了亦能觀察彼世界中一切衆生諸根心欲亦能

憶念彼世界中一切衆生前後十生亦能憶
念彼世界中過去未來各十劫事亦悉見彼
諸佛如來十本生事十成正覺十轉法輪十
種神通十種說法十種教誡十種辯才又即
成就十千菩提心十千三昧十千波羅蜜悉
皆清淨得大智慧圓滿光明得菩薩十種神
通柔輒微妙住菩提心堅固不動爾時文殊
師利菩薩勸諸比丘住普賢行住普賢行已
入大願海入大願海已成就大願海以成就
大願海故心清淨心清淨故身清淨身清淨

故身輕利身輕利故得大神通無有退轉得
此神通故不離文殊足下普於十方一切佛
所悉現其身具足成就一切佛法釋曰此即
道成也一三昧中有十通用皆圓益也疏啓
明東廟智滿不異於初心者第五成智益啓
明東廟者即第六十二經云爾時文殊師利
菩薩勸諸比丘發阿耨多羅三藐三菩提心
已漸次南行經歷人間至福城東住莊嚴幢
婆羅林中往昔諸佛教化衆生大塔廟處釋
曰此即東廟時福城人聞文殊師利童子

莊嚴幢娑羅林中大塔廟處無量大衆從其
城出來詣其所下別列中有五百優婆塞五
百優婆夷五百童男五百童女善財是一下
文殊師利獨觀善財既觀察已安慰開喻而
爲演說一切佛法乃至云說此法已殷勤勸
喻增長勢力令其歡喜發阿耨多羅三藐三
菩提心又令憶念過去善根作是事已復於
其處爲諸衆生隨宜說法然後而去爾時善
財童子從文殊師利所聞佛如是種種功德
一心勤求阿耨多羅三藐三菩提隨文殊師

利而說偈言等即啓明東廟也言智滿不異
於初心者即第八十經初智照無二相經云
是時文殊師利遙申右手過一百一十由旬
按善財頂作如是言善哉善哉善男子若離
信根心劣憂悔功行不具退失精勤於一善
根心生住著於少功德便已爲足不能善巧
發起行願不爲善知識之所攝護不爲如來
之所憶念不能了知如是法性如是理趣如
是法門如是所行如是境界若周徧知若種
種知若盡源底若解了若趣入若解說若分

別若證知若獲得皆悉不能釋曰了知法性
下即是智滿若離信心則不能得反顯前義
由信心故則得不離初發之心則信智無二
若約不動智爲初即前後二智無二也疏寄
位南求因圓不踰於毛孔者第六成位益謂
其善財初見文殊寄十信位德雲至瞿波寄
三賢十聖位摩耶已下並寄等覺後見普賢
便得因圓不踰毛孔文云時善財童子又見
自身在普賢身內十方一切諸世界中教化
衆生又云是善財童子從初發心乃至得見

普賢菩薩於其中間所入一切諸佛刹海今
於普賢一毛孔中一念所入諸佛刹海過前
不可說不可說佛刹微塵數倍如一毛孔一
切毛孔悉亦如是又云善財童子於普賢菩
薩毛孔刹中或於一刹經於一劫如是而行
乃至或經不可說不可說佛刹微塵數劫如
是而行亦不於此刹歿於彼刹現念念周徧
無邊刹海教化衆生今向阿耨多羅三藐三
菩提當是之時善財童子則次第得普賢
菩薩諸行願海與普賢等與諸佛等一身充

滿一切世界刹等行等正覺等神通等法輪
等言辭等音聲等力無畏等佛所住等_等大慈
悲等不可思議解脫自在悉皆同等釋曰此
即毛孔中因圓也疏剖微塵之經卷則念念
果成者第七顯因成果益即出現品大經潛
塵喻經偈云如有大經卷量等三千界在於
一塵內一切塵亦然有一聰慧人淨眼悉明
見破塵出經卷普饒益衆生佛智亦如是徧
在衆生心妄想之所纏不覺亦不知諸佛大
慈悲令其除妄想如是乃出現饒益諸菩薩

又經云應知自心心念念常有佛成正覺何以
故諸佛如來不離此心成正覺故念念相應
則念念成矣疏盡衆生之願門則塵塵行滿
者第八成就行願益謂菩薩發心化盡生界
生界若盡大願方終生界無窮大願無盡故
十地品云若衆生界盡我願乃盡而衆生界
不可盡故我此大願善根無有窮盡今衆生
界雖無有盡而等有經卷故普賢開之要令
盡無盡之衆生爲大願矣言塵塵行滿者菩
薩大悲不可盡故心量難思爲一衆生於一

塵中經無量劫修行萬行心不疲倦塵塵皆爾生生盡然方顯願行無窮盡也文殊菩薩讚善財云汝徧一切刹微塵等諸劫修行普賢行成就菩提道疏第八真可謂常恒之妙說下結歎宏遠於中分二先當相顯勝後對他顯勝今初四句初句佛說明常恒之說前後際而無涯故二通方之洪規者明其普徧無有一國不說此法故明是通方不同隨宜之教有說不說三稱性之極談者顯其深也一一稱理故一文一句不可盡故普賢大士

語善財云我法海中未有一文一句非是捨施無量轉輪王位而求得者四一乘之要軌者明其要妙謂於一乘之中是別教一乘不共之旨圓因之門成佛之妙故疏尋斯玄旨却覽餘經下二對他顯勝先法後喻初法可知後喻之中文有二喻初其猶杲日麗天奪眾景之曜者即智明映奪喻初昇之日謂之杲日麗者著也此經猶如杲日杲日既昇眾景奪曜景猶明也即大明流空繁星奪曜斯經大闡眾典無輝後須彌橫海落群峯之高

者即高勝難齊喻須彌即是此經群峯即是
餘經設七金鐵圍方餘高廣比妙高之出海
並落其高以俯望群峯如培塿故疏第九是
以菩薩搜秘於龍宮下感慶逢遇於中二一
明弘闡源由二正明感遇今初謂龍樹菩薩
五百年外方入龍宮搜求得斯玄奧之典事
如別傳及纂靈記言大賢闡揚於東夏者正
取覺賢兼餘大德謂智嚴法業日照實义等
闡揚斯典言於東夏者謂葱嶺之東地方數
千里謂之神州大夏而上云是以者由上深

妙故搜之闡之故龍樹入於龍宮廣見無數
偏誦此經者以玄妙故故智論詔為大不思
議經而諸大德皆見此經一文一句竭海墨
而莫書一偈一光破地獄之劇苦是以諸師
盡命弘傳耳疏顧唯正法之代尚匿清輝幸
哉像季之時偶斯玄化等者二正明感遇於
中亦二先對昔自慶後對今自慶今即初也
謂五百年前即當正法斯經清輝隱匿龍宮
之內時人不聞何幸像法垂末之年遇斯玄
微之化生居像末應合悲傷反顧前不聞經

未慙正法之代故自慶也此依不滅正法一
千年故今爲像末以今去大師涅槃一千八
百六十年故又按大集月藏分第一五百年
解脫牢固第二五百年禪定牢固第三五百
年多聞牢固第四五百年塔寺牢固第五
百年鬪諍牢固今居塔寺之末將隣鬪諍之
時翻聞難思之經碎身莫酬其慶疏况逢聖
主得在靈山竭思幽宗豈無慶躍者第二對
今自慶此慶有三一慶時二慶處三慶所修
初即况逢聖主謂明時難遇今值聖明天子

敷陳五教高闡一乘列刹相望鐘梵交響故
得閑居學肆探賾玄門斯一幸也二得在靈
山者慶處也清涼靈山三千之最文殊大聖
諸佛祖師金色雖在東方住處即爲金色大
聖雖周法界攝機長在此山感應普周若百
川影落清涼長在猶素月澄空萬聖幽贊於
五峯百祇傳慶於千古况大孚靈鷲標乎聖
寺之名一介微僧得在居人之數此之慶幸
爰媿多生斯再幸也三竭思幽宗者慶所修
也大方廣佛華嚴經即毗盧遮那之淵府普

賢菩薩之心髓一切諸佛之所證一切菩薩之所持包性相之無遺圓理智而特出不入餘人之手何幸捧而持之積行菩薩猶迷何幸探乎幽邃亡軀得其死所竭思有所歸幸之三也豈無慶躍結上三也其猶溺巨海而遇方舟墜長空而乘靈鶴慶躍之至手舞何階是故感之慶之唯聖賢之知我也疏第十題稱大方廣佛華嚴經者即無盡修多羅之總名下略釋名題以下第九門中廣釋故此云略於中有三先雙標經品二目二雙釋

永樂北藏

華嚴經隨疏演義鈔

第一七一册

二目後雙結上二今初先標經目謂若從略至廣展演無窮難思教海不離七字故云無盡修多羅之總名標經題也後世主妙嚴品第一者即衆篇義類之別目者標品目也衆篇即三十九品品者義類不同今當其一故云別目疏大以曠兼下二雙釋二目先釋總題後釋品目今初下有十門釋其七字字各十義今但略舉當字釋之然此七字略有六對一經字是教上六字是義即教義一對二嚴字是總上五是別即總別一對三華爲能

嚴上四皆所嚴即能所一對四佛是所嚴所
成之人上三皆所嚴之法即人法一對五廣
者是用上二皆體即體用一對六方者是相
大者是性即性相對故此七字即七大性
大者體大方者相大廣者用大佛者果大華
者因大嚴者智大經者教大則七字皆大七
字皆相等今各以二義釋之大以曠兼無際
者曠兼明其包含約廣徧釋大故涅槃云所
言大者其性廣博猶如虛空故下經云法性
徧在一切處一切衆生及國土三世悉在無

有餘亦無形相而可得也二無際者約其豎
論則常故名大涅槃云所言大者名之爲常
故下經云法性無作無變易猶如虛空本清
淨諸佛境界亦如是體性非性離有無然淵
府不可以擬其深妙故寄大以目之實則言
思斯絕故下經云法性不在於言論無說離
說恒寂滅諸佛境界不可量爲悟衆生今略
說疏方以正法自持亦二義者一方者正也
二方者法也並持自性通上二義謂恒沙性
德即是相大並無偏僞故稱爲正皆可軌持

目之爲法故下經云凡夫無覺解佛令住正法諸法無所住悟此見自身疏廣則稱體而周者此即用大用如體故無不周遍然亦二義由體有二義故一者能包二者能遍猶如虛空包含萬象遍至一切處今用稱體之包則一塵受世界之無邊二稱體之遍則刹那彌法界而無盡上之三字即體相用無有障礙爲所證之法界也疏佛謂覺斯玄妙者亦有二義一者能覺佛陀梵言此云覺者故二者所覺即上大方廣斯爲玄妙之境故云覺

斯玄妙斯即此也即此上大方廣耳若別說者覺上用者覺世諦也覺上體者覺真諦也覺上相者覺中道也三諦相融三覺無礙爲妙覺也疏華喻功德萬行者此亦二義一感果華喻萬行因成佛果故或與果俱或不與俱俱如蓮華表因果交徹故不俱如桃李不壞先因後果故二嚴身華喻諸位功德必與位位果俱故故下經云若見華開當願衆生神通等法如華開敷若見樹華當願衆生衆相如華具三十二疏嚴謂飾法成人者嚴亦

二義一以萬行飾其本體即嚴上大方廣如
 瑩明鏡鏡雖本淨非瑩不明二以萬行功德
 成佛果之人若琢玉成器又飾本體似鑄金
 成像以行成人如巧匠成像疏經乃注無竭
 之湧泉下唯經舉四義然亦唯二謂貫與攝
 湧泉即是所攝義味常乃通於上三一注無
 竭之湧泉者此言猶通諸教二貫玄凝之妙
 義以總就別別貫華嚴玄妙義故凝謂凝湛
 嚴整之貌也三攝無邊之海會者即是攝義
 無邊海會局此經衆揀餘衆故四作終古之

常規者即是當義餘處釋云常乃道軌百王
 今亦以通就別別屬此經法眼常全無缺減
 故常恒之說非隨宜故終古無忒可得稱常
 釋題竟疏佛及諸王並稱世主下釋品名此
 釋世主世謂世間即三世間一謂衆生世間
 二器世間三智正覺世間主謂君主即佛及
 諸王地神水神林神山神即器世間主天王
 龍王夜叉王等即衆生世間主如來即智正
 覺世間主亦總化上二遍統前三故云並稱
 世主疏法門依正俱曰妙嚴者此嚴亦說三

種世間法門為能嚴唯局於主依正所嚴通
三世間衆生及佛俱通正故謂諸世間主各
得法門自嚴已衆即衆生世間嚴並用嚴佛
亦智正覺嚴佛成正覺是自法門是故能令
其身充滿一切世間其音普順十方國土菩
薩衆中威光赫奕等即智正覺世間嚴其地
堅固金剛所成上妙寶輪及衆妙華清淨摩
尼以為嚴飾等即器世間嚴器世間嚴通二
法門一佛力令嚴是佛自嚴二能感者觀見
即是衆海法門嚴是故總云法門依正俱曰

妙嚴三世間嚴並勝餘教故標妙嚴以為品
目後斯經下雙結二目上文明不釋已上用
當同諸經之序分餘如下說自下第二歸敬
三寶請威加護有十六句大分為三初有八
句正歸敬三寶次有六句請威加護後有二
句迴施衆生初分二初句總明餘皆別顯
今初歸命二字顯能歸相三業普周歸向依
託無盡三寶但云命者以人所寶重莫過身
命今將仰投十方已下所歸分齊十方橫遍
三際豎窮極通橫豎就別顯中三寶即為三

別初三句歸佛次二句歸法後二句歸僧初中又二前之二句總歸諸佛後之一句別歸本師初中塵刹有其二義一所依處謂一一塵中諸刹土故佛所嚴刹等塵數故又塵約微細刹通麤細二即塵數如來圓謂圓寂明謂智明即菩提涅槃亦無德不圓無法不照故上二字自利調御師者通刹自他十號之一巧攝有情號法界亦二義一成上依處上云塵刹似當約事今云法界義兼事理佛身充滿於法界故又充滿法界無窮盡故二者

該後稱法界之功德大悲雲故功德者亦圓明中別義即十力無畏十八不共百四十種無盡之德大悲普覆無心含潤故喻於雲毗盧一句別歸本師乘恩重故四字標名三字讚德上云功德總該無盡今云大智別語最勝順於光明遍照義故大智深廣故喻於海又諸佛舉悲本師語智影略以明悲智深廣故悲亦稱海大悲深廣故智亦如雲含潤法雨故又前云功德此云大智成二嚴故無盡功德不出二故所住下二句歸法言所住者

躡前起後所以躡者顯同體故但歸別相不
會理故然三寶有三相一同相二別相三住
持相今通依之初同相者此有三義一約以
事就義門則別相之上各有三寶一佛體之
上有覺照義名爲佛寶軌則義邊名爲法寶
違諍過盡是名僧寶即以無漏法界功德爲
體二法上有三者法有覺性即是佛寶軌持
即是法寶法體無違即是僧寶三僧上三者
觀智爲覺爲佛寶軌則爲法寶在衆無違無
違衆生故名爲僧今舉佛所住以明法者即

約佛上論同體也理是佛所住教從佛所流
兩重相依二約會事從理門三寶皆依真故
今舉佛法皆歸真性略不言僧三約以理融
現門心性本覺即是佛寶恒沙性德皆可軌
持即是法寶此恒沙性德性相不二和合名
僧寶由此一門故今如來住真法性若無此
者何所住也三門雖異並稱同體故淨名云
佛即是法法即是衆是名三寶皆無爲相與
虛空等是故若就覺義並稱佛寶軌則而言
無非法寶冥符和合莫不皆僧義說有三不

可爲一然無別體豈爲異耶故云同相二別相者即如前科佛則橫該一切豎徹十身法則通四略舉理教上句是理下句是教僧雖該攝偏語大乘是故但舉文殊普賢三住持三寶者十身之中有力持身即住持佛其修多羅即住持法住持之僧含菩薩中然三三寶通於諸乘有其勝劣以義料揀歸勝非劣一理統之三三無異故並皆歸敬顯敬無遺三一一下二句歸僧初句明處一一微塵中有一切諸佛菩薩衆圍繞故況一一佛所難

思普賢住普賢位莫不皆爾下句舉人偏舉二者以是海會之上首故表理智故諸言不一則無所不該第二我今下請威加護六句分三初二句請歸之意意欲釋經故然通顯歸意乃有衆多總相而言者三寶吉祥一切衆生最勝良緣有歸依者能辦大事生諸善根離生死苦得涅槃樂故又一切經初有六成就令物信故佛滅度後凡諸弟子所有著述皆歸三寶示學有宗不自專已離過失故請威加護令契合故上句自謙智劣等彼一

毛下句讚法廣深同真法界一毛度空乍可知量凡智測法何能窮盡也次願承下二句願加護相上句明加下句明益今初未能深入三昧外感佛加但請同體之慈希霑勝益下句益中句句冥符願始末無違而言冥者亦謙辭也未得顯加且希冥契使凡心凡筆暗合聖心三俾令下二句著述所爲使令法眼圓滿化盡含生故賢首品云彼諸大士威神力法眼常全無缺減也第九迴向不願成佛唯願等於普賢者良以普賢該因徹果佛

前佛後皆悉有故普賢即是諸佛根本故法界體故故金剛頂經十方諸佛禮普賢者亦斯義矣然著述所爲但願大法弘通衆生利樂即悲智大意曲論別爲乃有多緣以斯經乃諸佛所證根本法輪諸教標準此方西域沙三無不仰遵而聖后沙二所翻文詞富博賢首將解大願不終方至第十九經奄然歸寂苑公言續於前疏亦刊削之筆格文詞不繼先古致令後學輕夫大經使遮那心源道流莫挹普賢行海後進望涯將欲弘揚遂發慨然之歎

若有過不說是非渾和豈唯掩傳者之明實
乃擁學人之路若指其瑕類出彼乖差豈唯
益是非之情實乃黷心智之境余故撫心五
頂仰託三尊不獲已而爲之也以斯別意略
有十焉一聖旨深遠各申見解故二顯乎心
觀不俟叅禪故三扶昔大義不欲掩人故四
翦截浮詞直論至理故五善自他宗不妄破
斥故六辨析今古新舊義殊故七明示法相
顯經包含故八廣演玄言令悟心要故九泯
絕是非不妄破斥故十均融始末首尾可觀

故初一爲總意後九爲別意指昔瑕疵疏中
欲掩是非傳者須知得失諸徒誠請難以違
之長時弘宣不繁數述恐迷宗滯迹競作是
非耳第一聖旨深遠各申見解者此爲總意
謂佛法沖深隨人智慧有深淺故斯亦爲遮
外難恐有難言世路以多歧亡羊學者以多
途喪志純源莫二枝派轉多舊疏新章益汨
真性何以屋上架屋床上安床昔已有之何
要改作故下十意皆通此疑今之初意正答
斯難特由聖旨深遠隨見不同各呈其能以

光法施昔可尚也安更有詞故五百比丘各說身因佛許無非正說三十二菩薩共談不二異見同歸故下經云無邊海會各入解脫之門境界萬差同趣如來智海故海慧菩薩云如來境界無有邊各隨解脫能觀見是以西域東夏釋論解經經有多家論文論有諸師解釋如析金杖金體不殊總收百川溟渤彌大故或登地菩薩或加行賢人或當代時英或如來懸記皆思拔群伍智出衆情而所見不同並傳於世各申其美共讚大猷依之

修行無不獲益今亦仰攀勝德以盡專精握管窺天滴流足海復何怪焉第二顯示心觀不俟叅禪者以經雖通詮三學正詮於定皆是如來定心所演故經云汝所說者文語非義我所說者義語非文況華嚴性海不離覺場說佛所證海印三昧親所發揮諸大菩薩定心所受昔人不詳至理不叅善友但尚尋文不貴宗通唯攻言說不能以聖教為明鏡照見自心不能以自心為智燈照經幽旨玄言理說並謂雷同虛已求宗詔為臆斷不知

